

tinus, quia aliquando esset concionaturus gentibus, sed quia vel non tantum in Iudea, sed etiam in Babylonia et Aegypto prophetavit, scribens ad Iudeos, qui ibi morabantur; vel etiam quia in sua prophetia non solum de rebus ad Iudeos spectantibus, sed etiam ad gentes prophetavit, nimirum de Assiriis, Aegyptiis, et aliis, ut ibi Hieron. exponit. Multo ergo magis frivolum est asserere Jeremiah non esse mortuum, quia in Scriptura mors ejus non scribitur; quasi vero omnes illi, quorum decessum Scriptura non narrat, propterea semper vivere existimandi sint. Quod igitur in Aegypto lapidibus a populo obrutus ac mortuus fuerit, scribunt Epiphan., lib. de Prophetar. vita et interitu; Isidorus, libr. de Vita et morte Sanctorum; et Dorotheus, in Synopsis; qui addunt sepultum esse in eo loco ubi Pharaon habitaverat, et in magno honore ejus sepulchrum ab Aegyptiis habitum. Igitur haec opinio ut improbabilis rejicienda est.

2. *Moyses secundi adventus Christi præcursor non futurus.* — Secunda sententia est, Moysem venturum cum Elia. Hanc tenuit Hilarius, dicto can. 20 in Matt., ubi affirmat eum vivere. Hanc sententiam quoad hanc posteriorem partem supra tractavimus, agentes de transfiguratione; quod utramque vero eam secutus est Catharinus, Genes. 3, et Joan. Arbor., in Theosophia, lib. 11, c. 11. Hi vero non affirmant solum Moysem venturum cum Elia, sed simul eum Henochi. Fertur etiam tenuisse hanc sententiam Joachimus Abbas, in expos. super Apoc., c. 11, et eamdem, licet diverso modo, secutus est Gagneius, Apoc. 11. Existimat enim Moysem mortuum esse, suscitandum tamen eo tempore, ut secundum Christi adventum præveniat. Fundamentum Hilarii fuit, quia in primo adventu Elias et Moyses fuerunt testes gloriae et maiestatis Christi in die transfigurationis; ergo iidem erunt testes ejus ante secundum adventum. Confirmat hoc Gagneius ex verbis illis Apoc. 11: *Potestatem habent super aquas convertendi eos in sanguinem, et percutere terram omni plaga.* Hac enim potestate Moysem dumtaxat usum legimus, et ideo optime in illum haec verba convenientia. Nihilominus haec sententia parum probabilitatis habet, primum propter antiquam fere omnium veterum traditionem, affirmantium (nt vidimus) Henoch venturum cum Elia. Secundo, quia supra ostendimus ex Scriptura, Moysem defunctum esse, ex quo fit animam ejus et cum Sanctis Patribus in sinu Abraham fuisse ante Christi

mortem, et post illam, cum eo regnare, esseque beatam. Quis enim temere audebit ab hac generali regula fidei sanctam Moysis animam excipere, sine auctoritate, vel rationis fundamento? Ergo non est verisimile reddituram ad corpus mortale, quia nec privanda est gloria quam jam possidet, nec in corpore mortali futura est beata. Utrumque enim est inusitatum miraculum, quod sine magno fundamento fingendum non est, sicut supra de Henoch et Elia argumentabamus. Præterea, quod Moyses in transfiguratione Christi apparuerit, nullum argumentum est quod sit etiam venturus ante judicium. Quæ enim est hujus consecutionis ratio? Tunc ergo apparuit propter speciales congruentias tunc occurrentes, quas suo loco tetigimus. Illa autem verba Apocalypsis, licet videantur alludere ad signa facta per Moysem in Aegypto, non tamen propterea indicant eumdem Moysem venturum, qui tunc illa signa patravit; sed solum significant facile posse Christum similem potestatem suis præcursoribus tribuere.

3. Tertia sententia est, Joannem Evangelistam futurum esse præcursorem secundi adventus Christi simul cum Henoch et Elia. Quae primo supponit illum nondum esse mortuum, propter verba Christi, Joann. ultimo: *Sic eum volo manere, donec veniam: quid ad te?* Nam ibi Christus de secundo suo adventu loquitur, cum ait: *Donec veniam, quia non est alius adventus Christi post resurrectionem ejus;* ergo ex voluntate Christi, *sic, id est,* sine morte mansurus fuit Joannes usque ad secundum Christi adventum, et ita verba Christi intellexere discipuli. Et confirmatur haec sententia ex historiis, quia nec mors Joannis Evangelistæ narratur, nec reliquiae corporis ejus inveniuntur, sed solum refertur quod vivus sepulchrum ingressus discipulos suos abire jussit, qui altera die reversi ibi nihil invenerunt. Secundo, hinc colligitur eum adhuc manere in corpore mortali, et aliquando moriturum. Probatur primo ex illa generali sententia: *Statutum est hominibus semel mori,* ad Heb. 9; Psal. 88: *Quis est homo qui vivet, et non videbit mortem?* Ergo ab hac sententia non est excipiendum Joannes sine fundamento; redditurus ergo est, ut debitum mortis solvat, si eut de Elia et Henoch argumentantur August., l. 9 Gen. ad lit., c. 6; et D. Thomas, ad Hebr. 11; et hoc est quod corrigere voluit ipsem Joannes, dicto cap. ultimo, cum scripsit: *Et non dixit Jesus: Non moritur, sed: Sic eum volo manere, donec veniam.* Quanquam enim

recte intellexissent Joannem ita mansurum usque ad adventum Domini, errabant inde colligentes non moritum, quia hoc non dixerat Christus, neque sequitur ex verbis ejus. Nam verba illa: *Donec veniam, non sunt intelligenda inclusive (ut sic dicam), sed exclusive, id est, donec instet adventus meus.* Secundo confirmari hoc potest ex aliis verbis Christi, Mat. 20: *Calicem quidem meum bibet;* ubi Chrys., hom. 66, ita exponit: *Martyrii corona potiemini, et violenta morte, sicuti et ego a vita discedetis.* Cum ergo hactenus Joannes Evangelista non sit passus martyrium, ut haec Christi verba implentur, necesse est ut aliquando martyrium usque ad mortem sustineat. Et hinc tandem fit verisimile, venturum Joannem cum Henoch et Elia, ut in fine mundi Christo testimonium perhibeat. Quia neque in aliud tempus, neque ad alium finem videtur posse reservari. Et confirmatur ex 10 c. Apoc., ubi Angelus dixit Joanni: *Oportet te iterum prophetare gentibus, et populis, et linguis, et regibus multis;* sed hoc hactenus impletum non est; erit ergo impletum saltem in consummatione mundi. Denique addi potest congruentia, quia testimonium Joannis aptissimum erit et efficacissimum, tum quia si venturi sunt testes legis naturæ et veteris, cur non etiam legis gratiae? Tum etiam quia Joannes erit testis oculatus, quique diutius cum Christo conversatus est, et omnia quæ ad Antichristum et diem judicii spectant, fusius quam alius prædixit. Atque hanc sententiam ex antiquis tenuit Hippol., dict. orat. de Consum. mundi; eamque indicat Damasc., orat. de Transfig., ubi tractans verba illa Luc. 9: *Sunt de hic stantibus, qui non gustabunt mortem, donec videant filium hominis in regno suo,* sic inquit: *Sane si tanquam de uno dixisset: Est quidam de hic stantibus, idem fortasse significari concessemus, quod per verba: Sic eum volo manere, donec veniam, quid ad te? Quod de Joanne Theologo dictum est, ut qui usque ad Christi adventum mortis omnino expers perstiturus sit; sic enim jam nonnulli præstanti eruditione viri hunc locum exposuerunt.* Eamdem fere sententiam tenet Ambrosius, tractans eadem verba Luc., l. 7 in Luc., in princ. Et eamdem referunt Theoph., Joann. ult., et Euthym., in Mat., c. 43, ut probabilem relinquunt. Eam vero tenuit etiam Simeon Metaphr., in Vita Joann.; ex recentioribus vero defendit Sabellius, l. 1 de Moralibus factis et dictis, c. 8; et Georg. Trapezuntius, libello circa dicta verba: *Sic eum volo manere;* et Catharin., Gen. 2.

Item Anton., 4 p., t. 13, c. 4, § 2, pro hac sententia refert Theophylum, et Joan. Dominicum, a qua ipse non discedit. Idem videtur sentire Freculphus, in Chron., t. 2, lib. 2, c. 9.

4. *Testimonii Joann. 21 expositio.* — Nihilominus probabilius apparet, Joannem Evangelistam mortuum esse. Primo, quia antiquissimi Patres, et historiæ hoc testantur. Eusebius, lib. 3 Histor., cap. 31, alias 25, qui id refert ex Polyerate, in ep. ad Victorem Pontificem, cuius verba valde notanda sunt: *In Asia preclara nostræ religionis tanquam seminaria morte consopita sunt, que resuscitabuntur in extremo die adventus Domini.* Et infra: *His accedit Joannes, qui supra peccatum Domini recubuit, qui sacerdos, Martyr et Doctor fuit, et Ephesi etiam obdormivit.* Idem Euseb., l. 5, c. 24; Hieron., lib. de Script. Eccles.: *Confectus (inquit) senio sexagesimo octavo post passionem Domini anno mortuus, juxta eamdem urbem sepultus est.* Quod repeatit 1. 4 contra Jovinianum, circa medium, et Math. 20; et Niceph., l. 1 Hist., c. 33, et l. 2, c. 42; Tertullian., lib. de Anima, c. 50: *Obiit et Joannes, quem in adventum Domini remansurum frustra fuerat spes.* Ambros., lib. de Fide resurr., parum ante medium, hanc sententiam insinuat, cum dicit: *Neque quisquam sibi, ut sic maneret, optavit, Joanni promissum estimatum est, sed non est creditum; verba tenemus, sententiam derivamus.* Ipse in libro negat sibi, quod non moreretur, esse promissum, ne quem rana spes exemplo incesseret. August., ser. 549 de Temp., dicit, *Joannem obdormisse sine vulnere, sine cruciatu;* et ita exponit verba Joann. 21, ut dicemus. Idem latius tractat ac docet, tract. 124 in Joann. Et ita etiam sentit Beda ibi; Theophyl. et Euthym., locis supra citatis; et Chrysost., hom. 1 in Joann. Dicit enim Joannem corpore quidem habitasse in Asia, animo vero in eum secessisse locum, qui idoneus et accommodatus ei esset, qui ejusmodi operaretur, ut Gentilium opiniones penitus abolerentur, sua autem in dies fierent clariora. Isidorus, l. de Vita et obitu Sanctorum, c. 74; et Dorotheus, in Synopsis in Joann., solum dicit, *Joannem vixisse annos 120, quibus finitis seipsum Ephesi, vivus adhuc, volente Domino sepelivit.* Quod apertius explicuit Epiphan., hær. 78, ubi, cum Eliam et Joannem in virginitatis dono æquales fecisset, subdit: *Sed neque Elias adorandus est (agit de latra), etiamsi in vivis sit, neque Joannes, quamquam per preces suas proprias dormitionem suam admirandam efficerit; ino potius ea Deo*

*gratiam acceperit. Præterea, in Concil. Ephes., t. 3, c. 6, sic dicitur: Sacras Sanctorum triumphantorumque Martyrum, maxime vero beatissimi Joannis Theologi ac Evangelistæ, reliquias videndi, easdemque complectendi desiderio flagrant; et tomo 2, c. 14, Cœlestinus Papa in Ep. ad Synodum Ephes.: Ante, inquit, vos præcipue considerare, iterum atque iterum recolere decet, quibus Joannes Apostolus prædicavit, cuius reliquias præsentes honoratis. Idem fere habetur in 7 Synod., act. 5, prope finem, ubi narratur miraculum de Joanne Anachoreta. Ex iis satis ergo constat, et mortuum esse Joannem, et ejus corpus Ephesi fuisse sepultum. Nam quod quidam finxerunt, ut Augustin. et Isidor. supra referunt, Joannem quidem vere fuisse sepultum, tamen vivum et dormientem sub terra servari, et incredibile est, et sine ullo fundamento conficatum. Huic etiam sententia Ecclesiae auctoritas magnam fidem facit, ut dicam. Neque ex verbis Christi Domini aliquid sumi potest contra hanc receptam historiam et traditionem. Ut enim omittam multa quæ de multiplici lectioне illius loci possent scribi, quæ in recentioribus expositoribus illius loci, et apud Franciscum Lucam in suis notationibus videri possunt, quia si legatur *si vel sic, vel si sic eum volo manere*, non multum refert, nec variat sensu verborum Christi; his, inquam, omissis, tres sunt probabiles sensus: primus, ut Christus non loquatur de secundo suo adventu ad judicium, sed de adventu ad vindicatam sumendam de Judæis, non personali præsentia, sed per effectum. Juxta quam expositionem significare voluit Christus, Joannem vivum permansurum usque ad destructionem Jerusalem. Hanc expositionem refert Theophil., eamque sequitur Franciscus Toletus. Secundus sensus est, Christum locutum esse de proprio adventu et ultimo, tamen nihil affirmasse, sed solum interrogando Petrum, conditionali locutione, illius euriositatem eluisset. Et hunc sensum videtur sequi Chrysostom., et apertius eum tradit Cyrillus. Tertius est, Christum solum affirmasse Joannem non futurum sui sectatorem per crucem et violentam mortem martyrii, et hoc sensu dixisse: *Sic eum volo manere, donec veniam, scilicet, ut ipsum ad me recipiam. Ita Augustinus, locis citatis, quem Beda et D. Thom. super Joan. imitantur.**

5. Joannes Evangelista beatitudine jam fruatur. — Ex hoc autem fundamento colligitur, Joannem jam cum Christo regnare in beatitu-

dine cœlesti, ut patet ex iis que de Moyse dicebamus. Quia generalis fidei regula est, hominem justum ac perfecte purgatum, post mortem statim consequi beatitudinem. Et hoc plurimum confirmat Ecclesiæ traditio. Celebrat enim festum Joannis Evangelistæ, cum neminem colat nisi beatum, Deoque frumentum, et ita hoc aperte supponit in toto officio illius festivitatis. Et hinc etiam confirmatur quod diximus de morte ejus, quia ante mortem corporis nullus hominum beatitudinem ingreditur. Dixerunt vero aliqui, Joannem non solum animo, sed etiam corpore jam esse beatum, non quod absque morte media ad illum statum fuerit assumptus, sed quod statim post mortem resurrexit gloriosus. Quod confirmant conjecturis supra adductis, quia reliquæ ejus non apparent; et præterea quia verba Christi videntur hoc modo proprius exponi. Nam propter brevitatem mortis et accelerationem resurrectionis, potest dici sic semper manere, quia illa mors quasi nihil reputatur; sicut supra in simili diximus, exponentes locum Pauli, 2 ad Thess. 4. Et hujus sententia meminit Ambr., ser. 20 in Psal. 118; et Hier., in ser. de Assumpt., neque eam rejiciunt; neque D. Thomas lect. 5 in c. 21 Joann.; eamque sequitur Niceph., supra. Sed nullum habet sufficiens fundamentum, quia ex antiquis Patribus (quos retulimus) constat reliquias ejus diu Ephesi permansiisse; quinimo Chrysostomus, hom. 26 in Epist. ad Hebr., cum dixisset: *Apostolorum plurimorum ossa noscimus, ubi jacent, subdit: Petri et Pauli quidem, Joannis et Thomæ manifesta sunt sepulcra;* loquitur autem manifeste de sepulcro in quo erant Joannis ossa, quæ supponit Ephesi fuisse. Postea vero alio transferri potuerunt et ignorari, vel casu aliquo perire. Historia autem illa, quod vivus ingressus fuerit sepulcrum, apocrypha est et incerta, maxime si fidem adhibeamus Abdiæ, qui lib. 5 Hist. Apostol., in fine, aliter refert mortem ejus, et illi se interfuisse affirmat. Et quamvis priorem historiam admittamus, ex ea solum habetur (quod supra ex Epiphanio retulimus), Joannem singulari et admirando quodam modo obiisse.

6. Joannes Evangelista secundi adventus Christi præcursor non futurus. — Atque ex his concluditur, Joannem non esse venturum eum Elia et Henoch, ut sit præcursor ultimi judicii. Probatur ex dictis, applicando rationes supra adductas de Moyse et Jeremia, quia anima jam beata non est iterum unienda cor-

DISPUTATIO LVI,

In quatuor sectiones distributa.

DE SIGNIS QUÆ PRÆCEDENT ADVENTUM CHRISTI AD JUDICIUM.

Supponimus multa signa et indicia antecessura esse diem judicii, et adventum Christi Domini, ut ex Scriptura statim ostendemus. Quod ut D. Thomas in 4 notavit partim pertinuit ad Christi dignitatem, et gloriam adventus ejus, juxta illud Aggæi 2: *Adhuc modicum, et ego commovere cœlum, et terram, et mare, et aridam, et venit desideratus cunctis gentibus;* nam, licet intelligi hoc possit de primo adventu, tamen potest etiam referri ad secundum, ex Paulo ad Heb. 12; partim ad utilitatem hominum, ut se prepararent ad judicium. Dicemus igitur de illis signis quæ in Scriptura sacra habent fundamentum. Cætera enim, quæ afferri solent, nullius sunt auctoritatis, qualia sunt illa quindecim, quæ ex Hieron. referunt Scholastici, in 4; D. Thom., d. 58, q. 4, a. 4, q. 1; et Sotus, d. 46, q. 2, a. 1. Illa enim neque apud Hieronymum reperi, et prædicti auctores affirmant Hieronymum non ea referre ex propria sententia, sed ex apocryphis quibusdam Judæorum annalibus. Attigit autem illa Euseb. Emissen., hom. in Domin. 2 Adventus, et (tacito nomine Hieronymi) inquit, in Annalibus Judæorum scripta referri. Postquam vero ea retulit, subiungit: *Nos tamen iis quidem auctoritatem non damus; ideo vero scripsimus, quia Evangelii verbis convenire videntur.* Illis ergo et aliis id genus prætermisis, signorum quæ in Scriptura indicantur, quædam sunt valde generalia et communia, quæ, fere quandiu Ecclesia Christi durat, diversis temporibus accidunt, quamvis veluti per antonomasiam illi tempori, quod proxime judicium antecedet, attribuantur. Hujusmodi sunt multa ex iis quæ Mat. 24 narrantur, ut illud. *Multi venient in nomine meo dicentes: Ego sum Christus, et multis seducunt. Audituri estis prælia, et opiniones præliorum, consurget gens in gentem, et regnum in regnum, et erunt pestilentia, et famæ, et terræmotus, et alia hujusmodi;* ejusdem generis sunt illa quæ narrat Paul., 1 ad Timoth. 4: *Spiritus autem manifeste dicit, quia in novissimis temporibus discedent quidam a fide attendentes spiritibus erroris et doctrinis dæmoniorum;* et 2 ad Timoth. 3: *In novissimis diebus instabunt tempora periculo-*